



SLUŽBENE NOVINE TUZLANSKOG KANTONA

GODINA 15 • TUZLA, SRIJEDA, 10. DECEMBAR 2008. GODINE • IZDANJE NA BOSANSKOM JEZIKU • BROJ 11

347

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 26. 11. 2008. godine, donosi

ZAKON

O VODAMA

I. OSNOVNE ODREDBE

Član 1.

(Predmet Zakona)

(1) Ovim Zakonom uređuje se način upravljanja vodama na području Tuzlanskog kantona (u daljem tekstu: Kanton), organizacija i način obavljanja poslova u vezi sa upravljanjem vodama iz nadležnosti Kantona.

(2) Upravljanje vodama obuhvata zaštitu voda, korištenje voda, zaštitu od štetnog djelovanja voda i uređenje vodotoka i drugih voda.

(3) Ovim Zakonom se uređuje vodno dobro i javno vodno dobro, vodni objekti, ovlaštenja i dužnosti kantonalnih i općinskih organa uprave, pravnih i fizičkih lica nadležnih za upravljanje vodama i druga pitanja u vezi sa vodama na području Kantona.

Član 2.

(Svrha Zakona)

Svrha ovog Zakona je osiguranje upravljanja vodama s ciljem:

- a) smanjenja zagađenja voda, postizanja dobrog stanja voda i sprečavanja degradacije voda,
- b) postizanja održivog korištenja voda,
- c) osiguranja pravičnog pristupa vodama,
- d) poticanja društvenog i privrednog razvoja,
- e) zaštite ekosistema,
- f) smanjenja rizika od poplava i drugih negativnih uticaja voda,
- g) osiguranja sudjelovanja javnosti u donošenju odluka koje se odnose na vode i
- h) sprečavanja i rješavanja sukoba u pogledu zaštite i korištenja voda.

II. OPŠTA NAČELA I DEFINICIJE

Član 3.

(Opšta načela i definicije)

(1) Vode su opšte dobro i kao takve su pod posebnom zaštitom Bosne i Hercegovine, Federacije Bosne i Hercegovine, Kantona, grada i općine.

(2) Osnovna načela i definicije upotrijebljene u ovom Zakonu imaju isto značenje, kao što imaju osnovna načela i definicije upotrijebljene u članovima 3. i 4. Zakona o vodama ("Službene novine Federacije Bosne i Hercegovine", broj: 70/06, u daljem tekstu: federalni Zakon).

III. POVRŠINSKE VODE I VODNO DOBRO U NADLEŽNOSTI KANTONA

Član 4.

(Površinske vode i vodno dobro u nadležnosti Kantona)

(1) Površinske vode u nadležnosti Kantona su površinske vode na području Kantona koje su federalnim Zakonom svrstane u vode II. kategorije.

(2) Ministarstvo poljoprivrede, šumarstva i vodoprivrede Tuzlanskog kantona (u daljem tekstu: Ministarstvo) utvrđuje granicu pojedinačnog vodnog dobra za površinske vode II. kategorije, u skladu sa propisom iz člana 8. federalnog Zakona.

(3) Granica vodnog dobra iz stava (2) ovog člana upisuje se u zemljišni katastar.

Član 5.

(Javno vodno dobro)

(1) Javno vodno dobro za površinske vode II. kategorije je dobro od opšteg interesa i u vlasništvu je grada, odnosno općine, ako zakonom nije drugačije uređeno.

(2) Upravljanje javnim vodnim dobrom iz stava (1) ovog člana vrše nadležni organi i pravna lica, u obimu i na način propisan ovim Zakonom ili drugim aktima nadležnog organa kojima je preneseno pravo upravljanja javnim vodnim dobrom.

(3) Rješenjem ministra poljoprivrede, šumarstva i vodoprivrede Tuzlanskog kantona (u daljem tekstu: ministar) utvrđuje se pripadnost vodnog dobra javnom vodnom dobru za površinske vode II. kategorije.

Član 6.

(Zahvati na vodnom dobru za površinske vode II. kategorije)

(1) Na vodnom dobru za površinske vode II. kategorije nije dozvoljeno izvoditi zahvate, osim:

- a) gradnje objekata javne infrastrukture (putevi, željeznice, mostovi, plinovodi i sl.),
- b) gradnje zaštitnih vodnih objekata,
- c) zahvata koji se odnose na poboljšanje hidromorfoloških i bioloških svojstava površinskih voda,
- d) zahvata koji se odnose na zaštitu prirode,

- e) gradnje objekata potrebnih za korištenje voda (objekti za zahvat i akumuliranje vode) i objekata za osiguranje plovidbe i zaštitu od utapanja na prirodnim kupalištima,
- f) gradnje objekata namijenjenih zaštiti voda od zagađenja,
- g) gradnje objekata namijenjenih za potrebe rada državnih organa, zaštitu i spašavanje ljudi, životinja ili imovine od prirodnih i drugih nesreća, te provođenje zadataka policije.

(2) Zahvati iz stava (1) ovog člana podliježu uslovima propisanim zakonom.

IV. VRSTE VODNIH OBJEKATA I VLASNIŠTVO NAD VODNIM OBJEKTIMA

Član 7. (Vodni objekti)

Vodni objekti su objekti ili skupovi objekata koji zajedno s pripadajućim uređajima, čine tehničku odnosno tehnološku cjelinu i služe za zaštitu od štetnog djelovanja voda, zahvatanje voda radi njihovog namjenskog korištenja i zaštitu voda od zagađivanja.

Član 8. (Zaštitni vodni objekti)

(1) Zaštitni vodni objekti su: nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retenzije i drugi pripadajući objekti, kao i objekti za zaštitu od erozija i bujica.

(2) Vodni objekti iz stava (1) ovog člana na vodotocima koji pripadaju površinskim vodama II. kategorije i uređena korita u urbanim područjima na površinskim vodotocima koji su federalnim Zakonom svrstani u površinske vode I. kategorije su u vlasništvu grada i općine.

(3) Grad i općina može pravo upravljanja i korištenja vodnih objekata iz stava (2) ovog člana prenijeti u nadležnost drugih organa ili pravnih lica, u obimu i na način propisan ovim Zakonom ili aktima grada i općine.

(4) Grad i općina su dužni da obezbijede materijalne i organizacione uslove za održavanje objekata iz stava (2) ovog člana u funkcionalnom stanju i da se oni koriste u skladu sa njihovom prirodom i namjenom, kao i čuvanje od uništenja, oštećenja, odnosno nenamjenskog korištenja.

(5) Grad i općina donose odluku o načinu korištenja i drugim potrebama od značaja za održavanje i čuvanje objekata iz stava (2) ovog člana.

Član 9. (Vodni objekti za odvodnjavanje)

(1) Vodni objekti za odvodnjavanje su: osnovna i detaljna odvodna kanalska mreža, crpne stanice za odvodnjavanje i drugi pripadajući objekti.

(2) Vodni objekti iz stava (1) ovog člana, koji su izgrađeni državnim sredstvima, u vlasništvu su Kantona.

(3) Pravo upravljanja i korištenja vodnih objekata iz stava (2) ovog člana Kanton može prenijeti na pravna lica.

(4) Vodni objekti iz stava (1) ovog člana, koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima.

Član 10. (Vodni objekti za iskorištavanje voda)

- (1) Vodni objekti za iskorištavanje voda su objekti za:
 - a) vodosnabdijevanje (izuzev za opću upotrebu voda) - brane i akumulacije, vodozahvati, bunari, kaptaže s

odgovarajućom opremom, postrojenja za prečišćavanje vode za piće, rezervoari i cjevovodi i drugi pripadajući objekti,

- b) snabdijevanje vodom privrednih subjekata - brane i akumulacije, vodozahvati, bunari, kaptaže s odgovarajućom opremom i cjevovodi i drugi pripadajući objekti,
- c) navodnjavanje - brane i akumulacije, dovodni kanali i tuneli, vodozahvatne građevine, crpne stanice, ustave, dovodna i razvodna mreža i drugi pripadajući objekti,
- d) korištenje vodnih snaga - brane i akumulacije, vodozahvati, dovodni i odvodni objekti i drugi pripadajući objekti i oprema,
- e) ostale namjene - objekti za uzgoj riba, rekreacioni bazeni, jezera i dr.

(2) Vodni objekti iz stava (1) tačke b), c) i e) ovog člana, koji su izgrađeni državnim sredstvima, u vlasništvu su Kantona.

(3) Pravo upravljanja i korištenja vodnih objekata iz stava (2) ovog člana, Kanton može prenijeti na pravna lica.

(4) Vodni objekti iz stava (1) tačke b), c) i e) ovog člana, koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima.

Član 11. (Kantonalni i međukantonalni vodovodi)

(1) Vodni objekti iz člana 10. stav (1) tačka a) koji služe za snabdijevanje vodom potrošača na području dvije ili više općina na području Kantona (u daljem tekstu: kantonalni vodovod) odnosno dvije ili više općina na području Kantona i drugog kantona (u daljem tekstu: međukantonalni vodovod), su u vlasništvu Kantona, odnosno Kantona i drugog kantona, ako nisu u vlasništvu drugih pravnih lica koja su te objekte izgradili za svoje potrebe.

(2) Pod objektima kantonalnog vodovoda odnosno međukantonalnog vodovoda, u smislu ovog Zakona, smatraju se samo dijelovi tih objekata koji obuhvataju: brane i akumulacije, vodozahvate, bunare, kaptaže sa odgovarajućom opremom, postrojenja za prečišćavanje vode za piće i glavne transportne cjevovode do distribucionih rezervoara općinskih vodovoda i drugi pripadajući objekti.

(3) Vodnim objektima iz stava (1) ovog člana upravlja pravno lice u skladu sa propisima o komunalnoj djelatnosti, kome je Kanton, odnosno Kanton i drugi kanton, prenio na upravljanje objekte kantonalnog, odnosno međukantonalnog vodovoda.

(4) Korisnici voda iz vodnih objekata iz stava (2) ovog člana su pravna lica iz člana 12. stav (2).

(5) Cijena vode koja se isporučuje iz vodnih objekata kantonalnog vodovoda, odnosno međukantonalnog vodovoda, ne može biti određena ispod iznosa iz kojeg se obezbjeđuju troškovi održavanja i funkcionisanja takvog vodovoda, amortizacija i otplata anuiteta za kredite obezbijedene za izgradnju tog vodovoda.

Član 12. (Gradski, općinski i mjesni vodovodi)

(1) Vodni objekti iz člana 10. stav (1) tačka a) za vodosnabdijevanje potrošača na području jednog grada ili općine su u vlasništvu grada, odnosno općine.

(2) Vodne objekte iz stava (1) ovog člana za vodosnabdijevanje potrošača u gradskim centrima (u daljem tekstu: gradski vodovodi) ili općinskim centrima (u daljem tekstu: općinski vodovodi) grad, odnosno općina svojom odlukom povjerava na upravljanje i korištenje pravnom licu u skladu sa propisima o komunalnoj djelatnosti.

(3) Vodne objekte iz stava (1) ovog člana za snabdijevanje vodom za piće naselja izvan gradskih, odnosno općinskih centara (u daljem tekstu: mjesni vodovodi), grad ili općina svojom odlukom

povjerala na upravljanje i korištenje pravnom licu u skladu sa propisima o komunalnoj djelatnosti.

(4) Izuzetno od stava (3) ovog člana, mjesne vodovode koji služe za snabdijevanje vodom za piće manje od 500 stanovnika, općina svojom odlukom može povjeriti na upravljanje i korištenje mjesnoj zajednici.

(5) Grad, odnosno općina je dužna da obezbijedi da se iz cijene vode iz vodnih objekata iz stava (1) ovog člana obezbjeđuju troškovi tekućeg i investicionog održavanja vodnih objekata, izdvajanje sredstava za amortizaciju i otplata anuiteta za kredite korištene za izgradnju, rekonstrukciju i sanaciju vodovoda, troškove propisanih pregleda zdravstvene ispravnosti vode za piće, te izvršavaju druge obaveze utvrđene ovim Zakonom radi očuvanja života i zdravlja potrošača.

Član 13.

Vodni objekti iz člana 10. stav (1) tačka a) koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima.

Član 14.

(Vodni objekti za korištenje vodnih snaga)

Vodni objekti iz člana 10. stav (1) tačka d) u vlasništvu su pravnih ili fizičkih lica koja su izgradila te objekte i koja upravljaju tim objektima.

Član 15.

(Vodni objekti za zaštitu voda od zagađivanja)

(1) Vodni objekti za zaštitu voda od zagađivanja (u daljnjem tekstu: vodni objekti za zaštitu voda) su: kolektori za prijem i transport otpadnih voda, postrojenja za prečišćavanje otpadnih voda, ispusti u prijemnik i drugi pripadajući objekti i oprema.

(2) Vodni objekti iz stava (1) ovog člana u čije objekte ispuštaju otpadne vode privredni subjekti i građani iz dva ili više gradova (u daljnjem tekstu: međugradski vodni objekti za zaštitu voda), odnosno dva ili više općinskih centara (u daljnjem tekstu: međuopćinski vodni objekti za zaštitu voda), su u vlasništvu grada, općine, odnosno drugih lica, koja su ih izgradila za svoje potrebe u srazmjeri sa visinom sredstava sa kojima je svaki grad, općina, odnosno drugo lice učestvovalo u izgradnji tih objekata.

(3) Vlasnici vodnih objekata iz stava (2) ovog člana brinu se za njihovu funkcionalnost i tehničku ispravnost.

(4) Grad i općina svojim odlukama povjeravaju na upravljanje i korištenje dio objekata međugradskog, odnosno međuopćinskog vodnog objekta za zaštitu voda (postrojenje za prečišćavanje otpadnih voda sa pripadajućim objektima i opremom) pravnom licu koje su za te potrebe osnovali gradovi, odnosno općine u skladu sa propisima o komunalnoj djelatnosti.

(5) Grad i općina su dužni da iz cijene prečišćavanja otpadnih voda iz međugradskog, odnosno međuopćinskog vodnog objekta za zaštitu voda, odnosno iz cijene korištenja kanalizacije koja dovodi otpadne vode na postrojenje za prečišćavanje otpadnih voda, obezbijede troškove održavanja međugradskog, odnosno međuopćinskog vodnog objekta za zaštitu voda iz stava (2) ovog člana, izdvajanje sredstava potrebnih za amortizaciju tog objekta i otplatu anuiteta za kredite korištene za izgradnju, rekonstrukciju i sanaciju tog objekta.

Član 16.

(Gradski, općinski i mjesni objekti za zaštitu voda)

(1) Vodni objekti iz člana 15. stav (1) u čije objekte ispuštaju otpadne vode privredni subjekti i građani na području jednog grada, odnosno općine su u vlasništvu grada, odnosno općine.

(2) Vodni objekti iz stava (1) ovog člana u čije objekte ispuštaju otpadne vode privredni subjekti i građani u gradskim, odnosno općinskim centrima su gradski, odnosno općinski vodni objekti za zaštitu voda.

(3) Grad i općina svojom odlukom povjeravaju na korištenje i upravljanje sve ili dio objekata gradskog, odnosno općinskog vodnog objekta za zaštitu voda iz stava (2) ovog člana, pravnom licu osnovanom za odvođenje otpadnih voda u skladu sa propisima o komunalnoj djelatnosti, ako pravo upravljanja dijelom tih objekata (postrojenje za prečišćavanje otpadnih voda sa pripadajućim objektima i opremom) nije prenijelo drugom pravnom licu.

(4) Vodne objekte iz stava (1) ovog člana u čije objekte ispuštaju otpadne vode privredni subjekti i građani izvan gradskih, odnosno općinskih centara (u daljnjem tekstu: mjesni vodni objekti za zaštitu voda), grad, odnosno općina svojom odlukom povjerala na upravljanje i korištenje pravnom licu u skladu sa propisima o komunalnoj djelatnosti.

(5) Izuzetno od stava (4) ovog člana, mjesne vodne objekte za zaštitu voda za manje od 500 stanovnika, grad, odnosno općina svojom odlukom može povjeriti na upravljanje i korištenje mjesnoj zajednici.

(6) Grad i općina su dužni obezbijediti da se iz cijene korištenja kanalizacije i prečišćavanja otpadnih voda iz vodnog objekta za zaštitu voda iz stava (1) ovog člana osiguraju troškovi tekućeg i investicionog održavanja tog objekta, izdvajanje potrebnih sredstava za amortizaciju tog objekta i otplatu anuiteta za kredite korištene za izgradnju, rekonstrukciju i sanaciju tog objekta.

Član 17.

Vodni objekti iz člana 15. stav (1) koje su za svoje potrebe izgradila pravna ili fizička lica, u njihovom su vlasništvu i ona upravljaju tim objektima.

Član 18.

(Višenamjenski vodni objekti)

Vodni objekti iz člana 8. stav (1), člana 10. stav (1) i člana 15. stav (1) ovog Zakona mogu imati istovremeno i više namjena - višenamjenski vodni objekti.

Član 19.

(Višenamjenske akumulacije)

(1) Višenamjenske akumulacije čija je pretežna namjena snabdijevanje vodom privrede i stanovništva su u vlasništvu Kantona.

(2) Na vodama i obalama vještačkih akumulacija koje su u cjelini ili djelimično u vlasništvu Kantona, zabranjeno je:

- a) korištenje plovila na pogon naftom i naftnim derivatima,
- b) građenje turističkih naselja i kampova,
- c) građenje luka, pristaništa i vezova za čamce,
- d) postavljanje plutajućih objekata u vode višenamjenske akumulacije,
- e) izgradnja objekata za sportske i rekreativne namjene,
- f) građenje privrednih i drugih sličnih objekata,
- g) građenje stambenih i vikend objekata,
- h) kafezni uzgoj riba,
- i) transport tečnosti koje su po svom sastavu opasne za kvalitet voda višenamjenske akumulacije (nafta i naftni derivati, kiselina i dr.), bez odobrenja i pratnje policije,
- j) svaka druga aktivnost koja može negativno uticati na promjene režima voda u višenamjenskoj akumulaciji.

(3) Upravljanje i korištenje objekata višenamjenske akumulacije i voda u akumulaciji, kao i obalno zemljište uz višenamjensku akumulaciju, povjerala se pravnom licu registrovanom za obavljanje te djelatnosti, u skladu sa zakonom.

(4) Vlada Kantona propisuje način i uslove korištenja voda višenamjenskih akumulacija izgrađenih do dana stupanja na snagu ovog Zakona.

Član 20.
(Obala višenamjenske akumulacije)

(1) Pod obalom višenamjenske akumulacije iz člana 19. ovog Zakona smatra se pojas zemljišta uz vještačku akumulaciju u širini od 10 metara od linije dopiranja velikih stogodišnjih voda pri koti normalnog radnog nivoa u višenamjenskoj akumulaciji.

(2) Obala vještačke akumulacije služi za održavanje korita višenamjenske akumulacije, pristupa za preduzimanje mjera za saniranje posljedica havarijskog zagađenja voda višenamjenske akumulacije, onemogućavanja pristupa motornih vozila radi sprečavanja zagađenja voda višenamjenske akumulacije i onemogućavanje pristupa građana za korištenje voda višenamjenske akumulacije u skladu sa propisom iz člana 19. stav (4) ovog Zakona.

(3) Obala višenamjenske akumulacije ne može biti predmet prometa i deeksprijacije.

Član 21.
(Obaveze i odgovornosti vlasnika, odnosno korisnika vodnih objekata)

(1) Vlasnici, odnosno korisnici vodnih objekata iz članova 8. do 20. ovog Zakona dužni su objekte održavati u funkcionalnom stanju i koristiti ih u skladu sa njihovom prirodom i namjenom.

(2) Vlasnik, odnosno korisnik vodnog objekta iz stava (1) ovog člana dužan je u slučaju prestanka upotrebe tog objekta, postupiti u skladu sa vodnim aktom, odnosno objekat održavati u stanju koje neće prouzrokovati štete režimu voda i trećim licima.

(3) Ako vlasnik, odnosno korisnik ne održava vodni objekat u funkcionalnom stanju i ne koristi ga na način određen u stavovima (1) i (2) ovog člana, kantonalna vodna inspekcija rješenjem nalaže potrebne mjere.

(4) Vlasnik, odnosno korisnik vodnog objekta iz stava (1) ovog člana dužan je vodni objekat održavati i koristiti u skladu sa opštim aktom o održavanju, korištenju i osmatranju vodnog objekta i postupanju u slučaju kvara ili havarije na objektu.

(5) Vlasnik, odnosno korisnik vodnog objekta dužan je brinuti o čuvanju vodnih objekata i uređaja na njima od slučajnog ili namjernog oštećenja ili uništenja.

(6) Korisnik vodnih objekata iz člana 8. stav (1) ovog Zakona nije odgovoran za štete trećim licima koje su nastale zbog neizgrađenosti ili nedovoljne osposobljenosti vodnih objekata.

V. UPRAVLJANJE VODAMA

Član 22.
(Upravljanje vodama)

Upravljanje vodama na području Kantona provodi se u skladu sa zakonom i drugim propisima.

Član 23.
(Teritorijalne osnove upravljanja vodama)

(1) Osnovna teritorijalna jedinica za upravljanje vodama je vodno područje.

(2) Područje Kantona u cjelini pripada Vodnom području rijeke Save.

(3) Vodno područje rijeke Save obuhvata dio međunarodnog riječnog bazena Dunava (dio međunarodnog podbazena Save) na teritoriji Bosne i Hercegovine, odnosno na teritoriji Federacije Bosne i Hercegovine.

VI. KORIŠTENJE VODA

Član 24.
(Opšta upotreba voda)

(1) Svakome je dozvoljeno koristiti vodu običnim načinom koji ne zahtijeva posebne naprave i ne isključuje druge od jednakog korištenja vode (opšta upotreba vode).

(2) Zabranjeno je koristiti vodu u komercijalne svrhe, bez prethodno pribavljenih saglasnosti, dozvola, odobrenja i drugih akata u skladu sa zakonom.

Član 25.
(Pravo na snabdijevanje vodom za piće)

(1) Kanton, grad, općina, pravna lica i fizička lica dužni su, svako u okviru svojih prava i obaveza, da odlučuju, provode mjere i aktivnosti kojima će se obezbijediti da svi građani i ostali korisnici voda za piće na području Kantona budu u jednakom položaju kada je u pitanju snabdijevanje vodom za piće, kako u pogledu količine, tako i kvaliteta vode za piće.

(2) Područje Kantona (mjesna zajednica, općina, grad) koje ima dovoljno vode za piće za sadašnje i buduće potrebe utvrđene Planom upravljanja vodama za Vodno područje Save, ne može ometati ili sprečavati druga područja (mjesne zajednice, općine, grad) da se u istoj mjeri snabdijevaju vodom za piće, a koja te vode nemaju ili nemaju dovoljno na svom području.

Član 26.
(Prevođenje voda)

(1) Rješavanje pitanja snabdijevanja vodom za piće, kada lokalna izvorišta voda ne mogu da zadovolje potrebe za vodom za piće sadašnjih i budućih generacija, vrši se prevođenjem voda sa područja jedne mjesne zajednice na područje dvije ili više mjesnih zajednica i sa područja jedne općine odnosno grada na područje dvije ili više općina, odnosno grada.

(2) Prevođenje voda za piće ne može biti osnov za postavljanje oštetnih zahtjeva od strane mjesnih zajednica odnosno općina sa čijeg se područja prevode vode za piće za potrebe drugih mjesnih zajednica, općina ili grada, jer je korištenje voda za piće, kao opšteg dobra, jednako pravo svih građana i pravnih lica na području Kantona.

Član 27.
(Obaveza vođenja evidencije)

Pravna i fizička lica koja zahvataju i crpe vodu, osim opšte upotrebe vode, dužna su voditi evidenciju o količinama zahvaćene vode i o tome dostavljati podatke nadležnoj agenciji za vodno područje.

Član 28.
(Osiguranje zdravstvene ispravnosti vode za piće)

(1) Stalni i sistematski pregled vode i preduzimanje mjera za osiguranje zdravstvene ispravnosti vode za piće i tehničke ispravnosti uređaja, u skladu sa ovim Zakonom i federalnim Zakonom, dužno je osigurati pravno lice koje obavlja djelatnost vodosnabdijevanja.

(2) Izuzetno od stava (1) ovog člana, stalni i sistematski pregled vode i preduzimanje mjera za osiguranje zdravstvene ispravnosti vode za piće i tehničke ispravnosti uređaja mjesnog vodovoda iz člana 12. stav (4) ovog Zakona, dužna je osigurati mjesna zajednica.

VII. ZAŠTITA VODA**Član 29.**

(Opšta zaštita voda)

(1) Pravno i fizičko lice može koristiti vodu, ispuštati otpadne vode u površinske vode i vodno dobro ili vršiti druge aktivnosti i zahvate samo uz prethodno pribavljen vodni akt, za koje je ovim Zakonom propisana obaveza pribavljanja vodnog akta i u skladu sa tim vodnim aktom.

(2) Pravno i fizičko lice dužno je po isteku roka važenja vodne saglasnosti za vađenje materijala dovesti korito i obale vodotoka u stanje predviđeno vodnim aktom.

Član 30.

(Opšta obaveza odvodnje i tretmana otpadnih voda)

(1) Fizičko i pravno lice je dužno otpadnu vodu ispuštati u javni kanalizacioni sistem ili na drugi način, u skladu sa odlukom o odvodnji otpadnih voda.

(2) Odluka iz stava (1) ovog člana sadrži naročito: odredbe o načinu odvodnje otpadnih voda, obavezu priključenja na javni kanalizacioni sistem, uslove i način ispuštanja otpadnih voda na područjima na kojima nije izgrađen takav sistem, obavezu posebnog odlaganja i odstranjivanja opasnih i drugih materija, te obavezu održavanja javnih kanalizacionih sistema.

(3) Odluku iz stava (1) ovog člana na području grada donosi grad, a na području općine, općina.

(4) Odluku o odvodnji otpadnih voda s područja više gradova, odnosno općina Kantona donosi Vlada Kantona, na usaglašen prijedlog nadležnih gradova, grada i općine, općina, odnosno na prijedlog Ministarstva ukoliko nadležni gradovi, grad i općina, općine prethodno ne usaglase prijedlog.

(5) Donosilac odluke o odvodnji otpadnih voda iz stavova (3) i (4) jedan primjerak odluke dostavlja Ministarstvu.

Član 31.

(Septičke jame)

Pravna i fizička lica, vlasnici stambenih i privrednih objekata kao i vikend kuća koje se grade van naseljenih područja u kojima nije izgrađen vodni objekat za zaštitu voda, dužni su izgraditi nepropusne septičke jame i na iste priključiti stambene i privredne objekte, odnosno vikend kuće i obezbijediti čišćenje septičkih jama prema potrebi, a najmanje jednom godišnje od strane specijalizovanog pravnog lica.

Član 32.

(Uvođenje savremenih tehnologija u proizvodnim procesima)

(1) Zabranjuje se uvoz proizvodnih tehnologija koje ne zadovoljavaju standarde Evropske zajednice za očuvanje kvaliteta voda.

(2) Pravna lica, vlasnici privrednih objekata, dužni su preduzimati mjere u cilju zamjene postojećih novim tehnologijama koje zadovoljavaju standarde Evropske zajednice za očuvanje kvaliteta voda.

(3) Zabranjuje se izgradnja privrednih objekata na području Kantona, bez izgradnje uređaja za prečišćavanje otpadnih voda ili uređaja za smanjenje emisija opasnih i štetnih materija u atmosferu.

Član 33.

(Područja zaštite izvorišta vode za piće)

(1) Područje na kojem se nalazi izvorište vode koje se po količini i kvalitetu može koristiti ili se koristi za javno vodosnabdijevanje

mora biti zaštićeno od zagađenja i drugih nepovoljnih uticaja na zdravstvenu ispravnost vode ili izdašnost izvorišta.

(2) Zone sanitarne zaštite i zaštitne mjere za sva izvorišta koja se koriste ili planiraju koristiti za piće, što uključuje javne bunare, mjesne vodovode, općinske i kantonalne vodovode, kao i mineralne, termalne i termomineralne vode za piće, utvrđuje grad ili općina za čije potrebe se koristi izvorište, u skladu sa federalnim propisom o načinu utvrđivanja uvjeta za određivanje zona sanitarne zaštite i zaštitnih mjera za izvorište.

(3) Odluku o zonama sanitarne zaštite i zaštitnim mjerama kada se izvorište i zone sanitarne zaštite nalaze na području grada, odnosno općine za čije potrebe se koristi izvorište, donosi grad, odnosno općina.

(4) Odluku o zonama sanitarne zaštite i zaštitnim mjerama kada se izvorište i/ili zone sanitarne zaštite prostiru dijelom ili u cjelosti izvan područja grada ili općine za čije potrebe se koristi izvorište, donosi Vlada Kantona, na usaglašen prijedlog nadležnih gradova, grada i općine, općina, odnosno na prijedlog Ministarstva ukoliko nadležni gradovi, grad i općina, općine prethodno ne usaglase prijedlog.

(5) Pravna lica i fizička lica dužna su pridržavati se odluke o zonama sanitarne zaštite i zaštitnim mjerama izvorišta.

(6) Donosilac odluke o zonama sanitarne zaštite i zaštitnim mjerama iz stavova (3) i (4) jedan primjerak odluke dostavlja Ministarstvu.

VIII. UREĐENJE VODOTOKA I DRUGIH VODA I ZAŠTITA OD ŠTETNOG DJELOVANJA VODA**Član 34.**

(Obaveze nadležnih nivoa vlasti u osiguravanju uređenja vodotoka i drugih voda)

(1) Kanton, grad i općina osiguravaju uređenje vodotoka i drugih voda u skladu sa članovima 4. i 5. ovog Zakona, i to u okviru svoje nadležnosti.

(2) Kanton, grad, općina, pravna i fizička lica osiguravaju izgradnju, rekonstrukciju i održavanje vodnih objekata iz članova 8. do 19. ovog Zakona, i to u okviru svoje nadležnosti, na način propisan ovim Zakonom.

Član 35.

(Zaštita od štetnog djelovanja voda)

(1) Pod zaštitom od štetnog djelovanja voda podrazumijeva se provođenje aktivnosti i mjera u cilju smanjenja ili sprečavanja ugroženosti ljudi i materijalnih dobara od štetnog djelovanja voda i otklanjanje posljedica njihovog djelovanja.

(2) Zaštita od štetnog djelovanja voda odnosi se na odbranu od poplava i leda na vodotocima i zaštitu od erozije i bujica.

(3) Pored zaštite iz stava (2) ovog člana, zaštita od štetnog djelovanja voda obuhvata i mjere zaštite i otklanjanja posljedica prouzrokovanih vanrednim zagađenjem voda.

Član 36.

(Obaveze nadležnih nivoa vlasti u cilju zaštite od štetnog djelovanja voda)

(1) U cilju zaštite od štetnog djelovanja voda, Kanton, grad i općina na ugroženom području osiguravaju u okviru svoje nadležnosti prema odredbama ovog Zakona, planiranje mjera zaštite, gradnju i upravljanje zaštitnim vodnim objektima, a naročito gradnju nasipa, brana, pregrada, objekata za stabilizaciju dna i obala, objekata za odvođenje unutrašnjih voda i dr.

(2) Obim zaštite od štetnog djelovanja voda i potrebne mjere određuju se sljedećim planovima: posebnim planovima zaštite od

poplava i leda, planovima zaštite od erozije i bujica i planovima zaštite od vanrednog zagađenja voda.

(3) Planove iz stava (2) ovog člana za površinske vode II. kategorije donose Kanton, grad i općina, i to u okviru svoje nadležnosti, prema odredbama ovog Zakona.

Član 37.

(Aktivna odbrana od poplava)

(1) Za vrijeme neposredne opasnosti od pojave velikih (poplavnih) voda, Kanton, grad i općina osiguravaju u okviru svoje nadležnosti prema odredbama ovog Zakona i federalnog Zakona provođenje mjera aktivne odbrane od poplava.

(2) Ministar donosi plan o mjerama aktivne odbrane od poplava i načinu njihovog provođenja, za područja uz površinske vode II. kategorije na području Kantona.

Član 38.

(Sanacija posljedica štetnog djelovanja voda)

(1) Sanacija posljedica štetnoga djelovanja voda se izvodi na osnovu programa sanacije.

(2) Ako su posljedice štetnog djelovanja voda nastale na vodnom, priobalnom ili drugom zemljištu ili na vodnoj infrastrukturi ili drugom vodnom objektu i uređaju koji je u vlasništvu Kantona, sredstva za njihovu sanaciju osigurava Kanton.

(3) Ako su posljedice štetnog djelovanja voda nastale na vodnom objektu ili uređaju namijenjenom za posebno korištenje vode i vodnog dobra koji nije u vlasništvu Kantona, njegovu je sanaciju dužan osigurati vlasnik ili operator.

(4) Ako lice iz stava (3) ovog člana ne osigura sanaciju, a to je značajno za funkcioniranje sistema zaštite od štetnoga djelovanja voda, Ministarstvo sanaciju osigurava na teret tog lica.

(5) Bez obzira na odredbe stavova (2) do (4) ovog člana, troškove sanacije posljedica vanrednog zagađenja voda snosi pravno i/ili fizičko lice zbog čije je radnje ili propuštanja radnje nastupilo zagađenje.

(6) Program sanacije iz stava (1) ovog člana za površinske vode II. kategorije donosi Vlada Kantona na prijedlog Ministarstva, u roku od šest mjeseci od dana procjene štete i pripreme prijedloga programa sanacije. Procjenu štete i pripremu prijedloga programa sanacije vrši komisija za procjenu štete, u skladu sa ovim Zakonom, federalnim Zakonom i propisima o zaštiti od prirodnih i drugih nesreća.

Član 39.

(Zabrana mijenjanja pravca i količine voda na štetu susjednog zemljišta)

(1) Vlasnik, odnosno korisnik zemljišta ne može na štetu susjednih zemljišta mijenjati pravac ili količinu vode koja prirodno otiče preko njegovog zemljišta ili kroz njegovo zemljište.

(2) Vlasnik, odnosno korisnik zemljišta iz stava (1) ovog člana dužan je vratiti u predašnje stanje pravac i količinu vode koju je preusmjerio na štetu susjednog zemljišta.

IX. VODNI AKTI

Član 40.

(Vrste vodnih akata)

(1) Radi osiguranja upravljanja vodama i osiguranja pravičnog pristupa vodi, svim pravnim i fizičkim licima propisuje se način ostvarivanja prava na vodu u vodnim aktima.

(2) Vodni akti u smislu ovog Zakona su:

- a) prethodna vodna saglasnost,
- b) vodna saglasnost, i
- c) vodna dozvola.

(3) Vodni akti su upravni akti koje u formi rješenja izdaje Ministarstvo, i protiv istih se može izjaviti žalba Federalnom ministarstvu poljoprivrede, vodoprivrede i šumarstva.

Član 41.

(Nadležnost Ministarstva za izdavanje vodnih akata)

(1) Ministarstvo izdaje vodne akte iz člana 40. stav (2) ovog Zakona za:

- a) zahvatanje vode u količini do 10 litara u sekundi,
- b) ispuštanje otpadnih voda za naselja koja imaju do 2.000 stanovnika,
- c) vađenje materijala iz površinskih voda II. kategorije,
- d) izgradnju hidroelektrane za proizvodnju električne energije, kada je postrojenje locirano na površinskim vodama II. kategorije, snage do 5 MW,
- e) formiranje akumulacije koja je locirana na površinskim vodama II. kategorije i nalazi se na području Kantona,
- f) izgradnju objekata za zaštitu od poplava na površinskim vodama II. kategorije, ako te aktivnosti ne utiču na površinske vode I. kategorije,
- g) izgradnju regionalnih i lokalnih saobraćajnica, uključujući i šumske puteve,
- h) izgradnju mostova ili drugih objekata iznad ili u površinskim vodama II. kategorije,
- i) uređenje vodotoka na površinskim vodama II. kategorije,
- j) ispuštanje otpadnih voda pojedinačnih objekata koje se vrši putem septičkih jama.

Član 42.

Na vodne akte iz članova 40. i 41. ovog Zakona primjenjuju se odgovarajuće odredbe o vodnim aktima federalnog Zakona i podzakonskih akata donesenih na osnovu federalnog Zakona, ako ovim Zakonom nije drukčije određeno.

X. IZGRADNJA, KORIŠTENJE, ZAŠTITA, ODRŽAVANJE I UPRAVLJANJE MJESNIM VODOVODIMA, JAVNIM BUNARIMA I JAVNIM ČESMAMA

Član 43.

(Odluka o izgradnji, korištenju, zaštiti, održavanju i upravljanju mjesnim vodovodima, javnim bunarima i javnim česmama)

(1) Snabdijevanje vodom za piće u naseljima izvan gradskog, odnosno općinskog centra vrši se u skladu sa odlukom o izgradnji, korištenju, zaštiti, održavanju i upravljanju mjesnim vodovodima, javnim bunarima i javnim česmama.

(2) Odluka iz stava (1) ovog člana sadrži naročito: odredbe o načinu i uslovima snabdijevanja vodom za piće, načine i uslove izgradnje, zaštite voda, korištenja, dodatnog priključenja, održavanja i upravljanja mjesnim vodovodima, javnim bunarima i javnim česmama na području grada, odnosno općine.

(3) Odluku iz stava (1) ovog člana donosi grad, odnosno općina.

Član 44.

(Mjesni vodovod)

(1) Mjesni vodovod je vodni objekat za snabdijevanje vodom za piće naselja izvan gradskog, odnosno općinskog centra.

(2) Pod mjesnim vodovodom iz stava (1) ovog člana smatra se i vodni objekat za snabdijevanje vodom za piće vikend naselja.

(3) Upravljanje i korištenje mjesnih vodovoda iz stavova (1) i (2) vršit će se na način propisan članom 12. stavovi (3) i (4) ovog Zakona

Član 45.

(Javni bunar i javna česma)

(1) Javni bunar je vodni objekat za snabdijevanje vodom za piće sa odgovarajućom zaštitnom zonom i odgovarajućim uređajima, koji služi za snabdijevanje vodom za piće najmanje dva domaćinstva.

(2) Javna česma je vodni objekat za snabdijevanje vodom za piće sa odgovarajućom zaštitnom zonom i odgovarajućim uređajima koji služi za snabdijevanje vodom za piće stanovnika naselja izvan gradskog, odnosno općinskog centra i prolaznika.

(3) Javna česma može biti izgrađena i na području gradskog, odnosno općinskog centra.

Član 46.

(Snabdijevanje vodom za piće)

(1) Izvorišta voda koja se zahvataju radi snabdijevanja vodom za piće naselja izvan gradskog, odnosno općinskog centra putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdijevanje vodom stanovnika naselja izvan gradskog, odnosno općinskog centra.

(2) Kaptaza i rezervoari koji su u smislu ovog Zakona sastavni dio mjesnog vodovoda, a koji služe za prihvatanje i akumuliranje vode za piće, moraju imati propisne izolacije i ostale potrebne uređaje.

(3) Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.

(4) Mjesni vodovod mora imati ugrađen i propisno baždaren uređaj za mjerenje količina iskorištene vode na odvodu iz rezervoara, a ako ima više odvoda iz rezervoara, na svakom odvodu.

(5) Ako je kapacitet izvorišta veći od stvarnih potreba korisnika mjesnog vodovoda (za piće, sanitarne potrebe, napajanje stoke) na rezervoaru tog mjesnog vodovoda ugrađuje se česma sa betonskim koritom za javnu upotrebu (javna česma).

Član 47.

(Investitori za izgradnju mjesnog vodovoda)

Investitor za izgradnju mjesnog vodovoda može biti grad, općina ili mjesna zajednica.

Član 48.

(Dokumenti potrebni za izgradnju mjesnog vodovoda)

(1) Izgradnja mjesnog vodovoda vrši se na osnovu izdatog odobrenja za građenje po propisima o prostornom uređenju odnosno građenju, uz prethodno pribavljanje vodne saglasnosti.

(2) Odobrenje za građenje iz stava (1) ovog člana izdaje se na osnovu prethodno izdate urbanističke saglasnosti, koja se izdaje nakon pribavljene prethodne vodne saglasnosti.

(3) Uz zahtjev za izdavanje vodne saglasnosti iz stava (1) ovog člana podnosi se dokumentacija, koja naročito sadrži podatke:

- a) o izdašnosti izvorišta,
- b) o sadašnjoj i budućoj potrebnoj količini vode za piće,
- c) o zdravstvenoj ispravnosti vode za piće,
- d) dokaz da objekat odgovara propisanim mjerama za obezbjeđenje zdravstvene ispravnosti vode za piće,
- e) odluka o zonama sanitarne zaštite i zaštitnim mjerama izvorišta,

f) projektna dokumentacija najmanje na nivou idejnog projekta.

Član 49.

(Vodna dozvola za mjesni vodovod)

(1) Po izvršenoj izgradnji ili rekonstrukciji mjesnog vodovoda ili javnog bunara, a prije izdavanja odobrenja za upotrebu po propisima o prostornom uređenju odnosno građenju, pribavlja se vodna dozvola.

(2) Uz zahtjev za izdavanje vodne dozvole za mjesni vodovod dostavlja se odluka iz člana 43. ovog Zakona.

Član 50.

(Zaštita izvorišta mjesnih vodovoda i javnih bunara)

Zaštita izvorišta mjesnih vodovoda i javnih bunara vrši se u skladu sa članom 33. ovog Zakona.

Član 51.

(Zabranjene aktivnosti na objektima mjesnog vodovoda i javnog bunara)

Zabranjeno je neovlaštenim licima da vrše otvaranje i zatvaranje vodovodnih armatura, instalacija, hidranata i ostalih uređaja mjesnih vodovoda i javnih bunara, izuzev u slučaju kada je to nužno u cilju sprečavanja šteta većih razmjera (pucanje cijevi, požara i slično).

Član 52.

(Zabranjene aktivnosti na javnim bunarima i javnim česmama)

Zabranjeno je na javnim bunarima i javnim česmama pranje rublja, kupanje, napajanje stoke, pranje motornih i drugih vozila, što bi moglo ugroziti zdravstvenu ispravnost vode za piće, odnosno oštećenje instalacija i uređaja javnih bunara i javnih česmi.

Član 53.

(Održavanje javnih česmi)

O održavanju javnih česmi brine se grad, odnosno općina, putem mjesne zajednice.

Član 54.

(Evidencija o mjesnim vodovodima i javnim bunarima)

(1) Gradska, odnosno općinska uprava dužna je da ustroji i vodi evidenciju o mjesnim vodovodima i javnim bunarima i da blagovremeno registruje sve promjene od značaja za mjesne vodovode i javne bunare.

(2) U evidenciji iz stava (1) ovog člana unose se naročito podaci o:

- a) nazivu mjesnog vodovoda, odnosno javnog bunara,
- b) mjesnoj zajednici,
- c) broju i datumu izdavanja prethodne vodne saglasnosti,
- d) broju i datumu izdavanja urbanističke saglasnosti,
- e) broju i datumu izdavanja vodne saglasnosti,
- f) broju i datumu izdavanja odobrenja za građenje,
- g) broju i datumu izdavanja vodne dozvole,
- h) broju i datumu izdavanja upotrebne dozvole,
- i) broju i datumu izdavanja sanitarne saglasnosti,
- j) broju domaćinstava koja koriste mjesni vodovod, odnosno javni bunar,
- k) broju naknadno priključenih domaćinstava na mjesni vodovod.

XI. FINANSIRANJE**Član 55.**
(Izvori sredstava)

Poslovi koji su, prema odredbama federalnog Zakona i ovog Zakona, stavljeni u nadležnost Kantona, finansiraju se iz sredstava određenih federalnim Zakonom i ovim Zakonom, a naročito iz:

- a) dijela opšte vodne naknade i posebnih vodnih naknada koje u skladu sa federalnim Zakonom pripadaju Kantonu,
- b) prihoda po osnovu zakupa javnog vodnog dobra na površinskim vodama II. kategorije,
- c) sredstava Budžeta Kantona i budžeta grada i općina, obezbijeđenih za finansiranje određenih namjena u vodoprivredi Kantona i drugih zadataka, u skladu sa federalnim Zakonom i ovim Zakonom,
- d) kreditnih sredstava,
- e) sredstava osiguranih posebnim zakonom,
- f) donacija i ostalih sredstava u skladu sa zakonom.

Član 56.
(Korištenje sredstava)

Sredstva iz člana 55. ovog Zakona koriste se za:

- a) finansiranje poslova iz člana 57. stav (1) ovog Zakona,
- b) sufinansiranje izgradnje i održavanje zaštitnih vodnih objekata, vodnih objekata za iskorištavanje voda i vodnih objekata za zaštitu voda od zagađivanja,
- c) ostale aktivnosti u vezi sa upravljanjem vodama (izrada tehničke dokumentacije, podloga za izdavanje koncesija i dr.) u skladu sa godišnjim planom i programom Ministarstva.

Član 57.
(Poslovi Ministarstva u vezi sa korištenjem sredstava)

(1) Ministarstvo obavlja poslove u vezi sa korištenjem sredstava utvrđenih ovim Zakonom, a naročito:

- a) izrade godišnjeg programa ulaganja sredstava vodnih naknada na području Kantona, u skladu sa strategijom upravljanja vodama i planom upravljanja vodama za vodno područje Save,
- b) organizacije vršenja poslova na izvršavanju programa iz tačke a) ovog člana,
- c) organizacije istražnih radova, izrade investiciono-tehničke i druge dokumentacije i vršenja revizije te dokumentacije,
- d) vršenja investicionih poslova i supervizor nad namjenskim utroškom sredstava za izgradnju vodnih objekata prema programu ulaganja sredstava vodnih naknada,
- e) planiranja i prikupljanje sredstava za finansiranje poslova iz programa sredstava vodnih naknada,
- f) saradnje sa gradovima, općinama, privrednim društvima i drugim pravnim licima na području Kantona,
- g) saradnje sa Agencijom za vodno područje rijeke Save u izradi plana upravljanja vodama za područje Kantona,
- h) i druge poslove.

(2) Ministarstvo je dužno da osigurava racionalno korištenje sredstava koja su obezbijeđena za obavljanje poslova u skladu sa ovim Zakonom.

XII. NADZOR**Član 58.**
(Upravni nadzor)

(1) Ministarstvo vrši upravni nadzor nad provođenjem ovog Zakona i propisa donesenih na osnovu ovog Zakona.

(2) Grad, odnosno općina vrši upravni nadzor nad provođenjem propisa koje donose na osnovu ovog Zakona, a u okviru svoje nadležnosti.

Član 59.
(Nadzor zdravstvene ispravnosti vode za piće)

Nadzor nad provođenjem odredaba ovog Zakona koje se odnose na zdravstvenu ispravnost vode za piće iz međukantonalih, kantonalnih, općinskih, mjesnih vodovoda, javnih bunara i javnih česmi vrši Ministarstvo zdravstva Kantona.

Član 60.
(Inspekcijiski nadzor)

Inspekcijiski nadzor nad provođenjem ovog Zakona i propisa donesenih na osnovu ovog Zakona vrši Kantonalna uprava za inspekcijiske poslove, putem kantonalnih vodnih inspektora.

Član 61.
(Inspekcijiski postupci)

(1) Kada utvrdi da postoji povreda ovog Zakona, propisa ili drugih akata donesenih na osnovu ovog Zakona, kantonalni vodni inspektor u zapisniku konstatuje nepravilnost ili nedostatak i rješenjem nalaže mjere i rok za njihovo otklanjanje.

(2) Pored ovlaštenja i dužnosti utvrđenih zakonom, u slučaju iz stava (1) ovog člana, kantonalni vodni inspektor ovlašten je i dužan:

- a) narediti obustavljanje izvođenja radova, ako se vrše protivno vodnom aktu ili se vrše bez vodnog akta, a propisana je obaveza njegovog pribavljanja,
- b) narediti, u saradnji sa građevinsko-urbanističkom inspekcijom, uklanjanje sagrađenog objekta ili postrojenja izgrađenog bez vodnog akta, ako u roku od 60 dana nije pribavljen vodni akt,
- c) narediti privremenu obustavu rada, odnosno obavljanje djelatnosti pravnog lica ili njegovog dijela, ako utvrdi da otpadne vode sadrže opasne materije u količini većoj od dozvoljene ili se zahvataju veće količine vode od dozvoljenih,
- d) zabraniti preduzimanje radnji koje nisu dozvoljene ovim Zakonom.

Član 62.
(Žalba na rješenje vodnog inspektora)

(1) Protiv rješenja kantonalnog vodnog inspektora, koje je doneseno na osnovu ovog Zakona i propisa donesenih na osnovu ovog Zakona, žalba se izjavljuje Ministarstvu, putem Kantonalne uprave za inspekcijiske poslove.

(2) Žalba protiv rješenja kantonalnog vodnog inspektora odlaže izvršenje rješenja, osim u slučajevima utvrđenim federalnim Zakonom i drugim zakonom kada se donosi pisano ili usmeno rješenje i odmah naređuje njegovo izvršenje bez odlaganja.

XIII. KAZNENE ODREDBE**Član 63.**
(Prekršaji)

(1) Novčanom kaznom u iznosu od 3.000,00 KM do 15.000,00 KM kažnjava se za prekršaj pravno lice ako:

- a) postupa suprotno odredbi iz člana 6.,
- b) postupa suprotno odredbi člana 19. stav (2),
- c) ne održava u funkcionalnom stanju i ne koristi vodne objekte u skladu sa njihovom prirodom i namjenom (član 21. stav (1)),

- d) u slučaju prestanka upotrebe vodnog objekta ne postupa u skladu sa vodnim aktom, odnosno ne održava objekat u stanju koje neće prouzrokovati štete režimu voda i trećim licima (član 21. stav (2)),
 - e) ne brine o čuvanju vodnih objekata i uređaja na njima od slučajnog ili namjernog oštećenja ili uništenja (član 21. stav (5)),
 - f) postupa suprotno odredbi člana 24. stav (2),
 - g) ne osigura stalni i sistematski pregled vode i ne poduzme mjere za osiguranje zdravstvene ispravnosti vode za piće i tehničke ispravnosti uređaja (član 28. stavovi (1) i (2)),
 - h) postupa suprotno odredbama člana 29.,
 - i) postupa suprotno odredbi člana 30. stav (1),
 - j) postupa suprotno odredbi člana 31.,
 - k) postupa suprotno odredbama člana 32.,
 - l) postupa suprotno odredbi člana 33. stav (5),
 - m) postupa suprotno odredbama člana 39.,
 - n) postupa suprotno odredbi člana 51.,
 - o) postupa suprotno odredbi člana 52.,
 - p) ne postupa po rješenju vodnog inspektora iz člana 61. stav (1),
 - q) ne podnese zahtjev za izdavanje nove vodne dozvole u propisanom roku iz člana 70. stav (1),
 - r) ne podnese zahtjev za izdavanje vodne dozvole u propisanom roku iz člana 72.,
 - s) ne izgradi nepropusnu septičku jamu i na istu ne priključi stambeni ili privredni objekat u roku iz člana 74.
- (2) Za prekršaj iz stava (1) ovog člana kažnjava se i odgovorno lice u pravnom licu novčanom kaznom u iznosu od 600,00 KM do 3.000,00 KM.

Član 64.

(1) Novčanom kaznom u iznosu od 1.500,00 KM do 7.500,00 KM kažnjava se za prekršaj pravno lice ako ne vodi evidenciju o količinama zahvaćene vode i o tome ne dostavlja podatke nadležnoj agenciji za vode (član 27.),

(2) Za prekršaj iz stava (1) ovog člana kažnjava se i odgovorno lice u pravnom licu novčanom kaznom u iznosu od 400,00 KM do 2.000,00 KM.

(3) Za prekršaj iz stava (1) kažnjava se fizičko lice novčanom kaznom u iznosu od 200,00 KM do 1.000,00 KM.

Član 65.

Novčanom kaznom u iznosu od 300,00 KM do 1.500,00 KM kažnjava se za prekršaj fizičko lice ako:

- a) postupa suprotno odredbi člana 6.,
- b) postupa suprotno odredbi člana 19. stav (2),
- c) ne održava u funkcionalnom stanju i ne koristi vodne objekte u skladu sa njihovom prirodom i namjenom (član 21. stav (1)),
- d) u slučaju prestanka upotrebe vodnog objekta ne postupa u skladu sa vodnim aktom, odnosno ne održava objekat u stanju koje neće prouzrokovati štete režimu voda i trećim licima (član 21. stav (2)),
- e) ne brine o čuvanju vodnih objekata i uređaja na njima od slučajnog ili namjernog oštećenja ili uništenja (član 21. stav (5)),
- f) postupa suprotno odredbi člana 24. stav (2),
- g) postupa suprotno odredbama člana 29.,
- h) postupa suprotno odredbi iz člana 30. stav (1),
- i) postupa suprotno odredbi člana 31.,
- j) postupa suprotno odredbi člana 33. stav (5),
- k) na štetu susjednog zemljišta mijenja pravac ili jačinu vode koja prirodno otiče član 39. stavovi (1) i (2),

- l) postupa suprotno odredbi člana 51.,
- m) postupa suprotno odredbi iz člana 52.,
- n) ne postupa po rješenju vodnog inspektora iz člana 61. stav (1),
- o) ne podnese zahtjev za izdavanje nove vodne dozvole u propisanom roku iz člana 70. stav (1),
- p) ne podnese zahtjev za izdavanje vodne dozvole u propisanom roku iz člana 72.,
- q) ne izgradi nepropusnu septičku jamu i na istu ne priključi stambeni ili privredni objekat u roku iz člana 74.

XIV. PRELAZNE I ZAVRŠNE ODREDBE

Član 66.

(Planski dokumenti)

Do donošenja Strategije upravljanja vodama, kao planski dokumenti za upravljanje vodama u Kantonu, koristit će se odgovarajući planovi i programi razvoja vodoprivrede i pojedinih oblasti vodoprivrede (zaštita od štetnog djelovanja voda, zaštita voda i korištenje voda), doneseni do dana stupanja na snagu ovog Zakona.

Član 67.

(Ranije izdati vodoprivredni akti)

(1) Vodoprivredne dozvole koje su izdate u skladu sa Zakonom o vodama ("Službene novine Federacije BiH", broj 18/98), Zakonom o vodama ("Službene novine Tuzlanskog kantona", broj: 15/99, 9/03 i 3/06) i propisima donesenim na osnovu ovih zakona, usaglasit će se s odredbama ovog Zakona, u roku do pet godina od dana stupanja na snagu ovog Zakona.

(2) Vodoprivredni uslovi koji su izdati do 01.01.2008. godine usaglasiti će se sa odredbama ovog Zakona pri izdavanju vodne saglasnosti.

(3) Vodoprivredne saglasnosti koje su izdate do 01.01.2008. godine usaglasit će se s odredbama ovog Zakona pri izdavanju vodnih dozvola.

(4) Nosioci prava iz vodoprivrednog akta iz stava (1) ovog člana dužni su podnijeti zahtjev za preispitivanje vodne dozvole, u roku do dvije godine od dana stupanja na snagu ovog Zakona.

(5) U slučaju da zahtjev iz stava (4) ovog člana nije podnesen u roku iz stava (4) ovog člana, vodoprivredni akt iz stava (1) ovog člana prestaje da važi.

(6) Odredbe iz stava (1) ovog člana ne odnose se na vodoprivredne dozvole koje važe pet godina ili manje, od dana stupanja na snagu ovog Zakona.

Član 68.

(Neriješeni zahtjevi za izdavanje vodoprivrednih akata)

Zahtjevi za izdavanje vodoprivrednih akata koji su podneseni nadležnom organu do 01.01.2008. godine, rješavat će se u skladu sa Zakonom o vodama ("Službene novine Federacije BiH", broj 18/98), Zakonom o vodama ("Službene novine Tuzlanskog kantona", broj: 15/99, 9/03 i 3/06) i propisima donesenim na osnovu ovih zakona.

Član 69.

(Postupci po žalbama)

Postupci po žalbama koje nisu riješene do 01.01.2008. godine riješit će se u skladu sa Zakonom o vodama ("Službene novine Federacije BiH", broj: 18/98), Zakonom o vodama ("Službene novine Tuzlanskog kantona", br. 15/99, 9/03 i 3/06) i propisima donesenim na osnovu ovih zakona.

Član 70.

(Postojeći objekti i aktivnosti
za koje nije izdat vodoprivredni akt)

(1) Vlasnici, odnosno korisnici postojećih objekata i postrojenja koji iskorištavaju vode ili ispuštaju otpadne vode i druge opasne i štetne materije u vode, za koje nije pribavljena vodoprivredna dozvola do dana stupanja na snagu ovog Zakona, dužni su da podnesu zahtjev za izdavanje vodne dozvole u roku od šest mjeseci od dana stupanja na snagu ovog Zakona.

(2) U slučaju da zahtjev iz stava (1) ovog člana nije podnesen u predviđenom roku, rješenjem kantonalne vodne inspekcije zabranit će se upotreba objekata odnosno postrojenja iz stava (1) ovog člana.

Član 71.

Propis iz člana 19. stav (4) ovog Zakona donijet će se u roku od dvije godine od dana stupanja na snagu ovog Zakona.

Član 72.

(Rok pribavljanja vodne dozvole
za postojeće mjesne vodovode)

Vlasnici postojećih mjesnih vodovoda dužni su da za iste u roku od godinu godine od dana stupanja na snagu ovog Zakona, pribave vodnu dozvolu.

Član 73.

(Rok za uspostavu evidencije o mjesnim
vodovodima i javnim bunarima)

Općina je dužna najkasnije u roku od godinu dana od dana stupanja na snagu ovog Zakona, a grad u istom roku od dana konstituiranja gradskog vijeća, ustrojiti evidenciju o mjesnim vodovodima i javnim bunarima (član 54).

Član 74.

(Rok za izgradnju septičkih jama
za postojeće objekte)

Pravna i fizička lica, vlasnici stambenih i privrednih objekata, kao i vikend kuća, koje su podignute van naseljenih mjesta prije stupanja na snagu ovog Zakona dužni su da izgrade nepropusne septičke jame i na iste priključe stambene i privredne objekte odnosno vikend kuće u roku od 2 godine od dana stupanja na snagu ovog Zakona.

Član 75.

(Rok za donošenje odluka općina)

Odluke općina u skladu sa odredbama ovog Zakona donijet će se u roku od godinu dana od dana stupanja na snagu ovog Zakona, a odluke grada u istom roku od dana konstituiranja gradskog vijeća.

Član 76.

(Prestanak primjene zakona)

Danom stupanja na snagu ovog Zakona prestaje da važi Zakon o vodama ("Službene novine Tuzlanskog kantona", br. 15/99, 9/03 i 3/06).

Član 77.

(Stupanje na snagu i početak primjene)

Ovaj Zakon stupa na snagu osmoga dana od dana objavljivanja u "Službenim novinama Tuzlanskog kantona".

Bosna i Hercegovina
Federacija Bosne i Hercegovine
TUZLANSKI KANTON
Predsjednik
Skupštine Tuzlanskog kantona,
Skupština
Broj: 01-02-391-9/08
Tuzla, 26. 11. 2008. godine

348

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97, 3/99 i 13/96 i "Službene novine Tuzlanskog kantona", br. 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj dana 26. 11. 2008. godine, donosi

ZAKON**O NABAVLJANJU, DRŽANJU I NOŠENJU
ORUŽJA I MUNICIJE****DIO PRVI - UVODNE ODREDBE**

Član 1.

(Predmet)

Ovim Zakonom se utvrđuju uslovi za nabavljanje, držanje i nošenje oružja i municije, oduzimanje oružja i municije, promet oružja i municije, popravlanje i prepravlanje oružja na području Tuzlanskog kantona.

Član 2.

(Primjena)

(1) Oružje i municiju građani mogu nabavljati, držati i nositi samo po odredbama ovog Zakona.

(2) Odredbe ovog Zakona u pogledu nabavljanja, držanja i nošenja oružja i municije odnose se i na strane državljanke i lica bez državljanstva kojima je odobreno stalno nastanjenje na teritoriji Bosne i Hercegovine.

Član 3.

(Izuzeci u primjeni)

Odredbe ovog Zakona ne odnose se na pripadnike oružanih snaga, na policijske službenike, službenike sudske policije, pripadnike straže kazneno-popravnih ustanova, zaposlenike Obavještajno-sigurnosne agencije Bosne i Hercegovine, kada drže i nose oružje i municiju po propisima svoje službe.

Član 4.

(Primjena ZUP-a)

Na sva pitanja postupka, koja nisu uređena ovim Zakonom, primjenjuju se odredbe Zakona o upravnom postupku.

Član 5.

(Oružje)

(1) Kao oružje u smislu ovog Zakona smatra se:
a) vatreno oružje,